

歷代帝王宅京記卷十四

崑山顧炎武著

吳縣朱記榮校刊

雲中

後魏

魏書太祖本紀曰登國六年起河南宮天興元年冬十月起天文殿

二年春二月以所獲高車衆起鹿苑於南臺陰北距長城東包白登屬之西山廣輪數十里鑿渠引五川水注之苑中疏爲三溝分流宮城內外又穿鴻雁池 秋七月起天華殿

八月增啟京師十二門作西武庫

歷代帝王宅京記卷十四

一

朱氏槐廬校刊

冬十月太廟成 十二月天華殿成

三年春三月穿城南渠通於城內作東西魚池

秋七月起中天殿及雲母堂金華室

四年夏六月起紫極殿元武樓涼風觀石池鹿苑臺

六年冬十月起西昭陽殿

天賜元年冬十月築西宮

三年夏六月發八部五百里內男丁築灑南宮門闕高十餘丈引溝穿池廣苑囿規立外城方二十里分置市里經塗洞達三十日罷

四年秋七月築北宮垣三十日罷

莫題傳曰道武欲廣宮室規度平城四方數十里將模

鄴雒長安之制運材數百萬根以題機巧徵令監之  
太宗本紀曰永興元年春二月癸丑穿魚池於北苑  
神瑞元年春二月乙卯起豐宮於平城東北

二年春二月甲辰立大祖廟於白登之西

泰常元年冬十一月戊寅起蓬臺於北苑

二年秋七月乙酉起白臺於城南高二十丈

三年冬十月戊辰築宮於西苑

四年春三月癸丑築宮於蓬臺北 秋九月築宮於白

登山

五年夏四月丙寅起灑南宮

六年春三月發京師六千餘人築苑起自舊苑東包白

歷代帝王宅京記卷十四

二

朱氏槐廬校刊

登周迴四十餘里

七年秋九月辛亥築平城外郭周迴三十二里

八年冬十月癸卯廣西宮起外垣墻周迴二十里

世祖本紀曰始廣二年春三月庚申營故東宮爲萬壽

宮起永安安樂二殿臨望觀九華堂秋九月永安安樂

二殿成

三年春三月起太學於城東

神麇四年秋七月起承華宮

延和元年秋七月築東宮

三年秋七月辛巳東宮成備置屯衛三分西宮之一

太平眞君十一年春二月大脩宮室皇太后於北宮

高宗本紀曰興安二年春二月乙丑發京師五千人穿天淵池

廟秋

后妃傳曰文成初穿天淵地獲一銘石稱桓帝葬母氏遠近赴會二十餘萬有司以間命藏之

秋七月築馬射臺於南郊

太安四年春三月丙辰起太華殿秋九月辛亥成

顯祖本紀曰皇興五年秋八月丙午傳位於太子帝稱太上皇帝已酉徙御崇光采椽不斲土堦而已

公孫叡傳曰顯祖於苑內立殿勅中秘羣宮制名叡曰臣聞至尊至貴莫崇於帝王天人挹損莫大於謙光伏惟陛下躬唐虞之德存道頤神逍遙物外宮居之名當協睿旨臣愚以爲宜曰崇先奏可

歷代帝王宅京記卷十四

三

朱氏槐廬校刊

高帝本紀曰延興三年春正月丁亥改崇光宮爲甯先宮

承明元年冬十月丁巳起七寶永安行殿

太和元年春正月辛亥起太和安昌二殿

李冲傳詔曰昔軒皇誕御垂棟宇之構爰歷三代興宮觀之式然茅茨土階昭德于上代層臺廣厦崇威於中葉良由文質異宜華樸殊禮故也是以周成繼業營明堂於東都漢祖聿興建未央於咸鎬蓋所以尊嚴皇威崇重帝德豈好奢惡儉苟敝民力者哉國家皇運統天協纂乾厯銳意四方靡遑建制宮室之度頗爲未允太祖初基雖粗有經式自茲厥後復多營改至於三元慶

饗萬國充延觀光之使具瞻有闕朕以寡德猥承洪緒  
運屬休期事鍾昌運宜遵遠度式茲宮宇指訓規模事  
昭於平日明堂太廟已成於昔年又因往歲之豐資藉  
民情之安逸將以今春營改正殿違犯時令行之惕然  
但朔土多寒事殊南夏自非裁度當春興役徂暑則廣  
制崇臺莫由克就成功立事非委賢不可改制規模非  
任能莫濟尙書冲器懷淵博經度明遠可領將作大匠  
司空長樂公穆亮可與大匠共監興繕其去故從新之  
宜脩復太極之制朕當別加指授

本紀又曰秋七月己酉二殿成起朱明思賢門

九月庚子起永樂遊觀殿於北苑穿神淵池

歷代帝王宅京記卷十四

四

朱氏槐廬校刊

三年春正月癸丑坤德六合殿成二月壬寅乾象六合  
殿成

夏六月辛未起文石室靈泉殿於方山

四年春正月癸卯乾象六合殿成

南監本亦作  
六合疑誤

秋七月壬子改作東明觀成

五年夏四月己亥行幸方山建永固石室於山上立碑  
於石室之庭又起鑒元殿

后妃傳曰馮太后與孝文遊於方山顧川阜有終焉之  
志因謂羣臣曰舜葬蒼梧二妃不從豈得遠祔山陵然  
後爲貴哉吾百歲後神其安此孝文乃詔有司營建壽  
陵於方山又起永固石室將終爲清廟焉太和元年起

作八年而成刊石立碑頌太后功德

七年冬十月戊午皇信堂成

九年秋七月丙寅朔新作諸門

十年秋九月辛卯朔詔起明堂辟雍

十二年秋九月丁酉起宣文堂經武殿

閏九月甲子築圓邱於南郊

十五年夏四月己卯經始明堂改太廟冬十月明堂太

廟成十一月丁卯遷七廟神主於新廟十二月壬辰遷

社於內城之西

蔣少游傳於平城將營太廟太極殿遣少游乘傳詣洛  
量準魏晉基趾

十六年春二月戊子帝移御永樂宮庚寅壞大華殿經  
始太極殿冬十月庚戌成

穆亮傳曰時將建太極殿引見羣臣於太華殿高祖曰  
朕仰遵先意將營殿宇役夫既至興工有日今欲徙居  
永樂以避囂埃土木雖復無心毀之能不悽愴今故臨  
對卿等與之取別此殿乃高宗所制爰歷顯祖逮朕沖  
年卽位於此但事來奪情將有改制仰惟疇昔惟深悲  
感亮稽首對曰臣聞稽之卜筮載自典經占以決疑古  
今攸尙興建之功事在不易願陛下訊之蓍龜以定可  
否又去歲役作爲功甚多太廟明堂一年便就若仍歲  
頻興恐民力凋敝况材幹新伐爲功不固願待逾年小

康百姓高祖曰若終不爲何如卿言後必爲之逾年何益朕遠覽前王無不興造故有周創業經建靈臺洪漢受終未央是作草創之初猶尙若此況朕承累聖之運屬太平之基且今八表清晏年穀又登爰及此時以就大功人生定分脩短命也蕃蔡雖智其如命何當委之大分豈假卜筮遂移御永樂宮

本紀又曰十一月乙卯依古六寢權制三室以安昌殿爲內寢皇信堂爲中寢四合殿爲外寢

十七年春三月戊辰改作後宮幸永興園徙御宣文室南齊書魏虜傳曰什翼珪道武帝始都平城猶逐水草無

城郭木末

明元帝

始土著居處佛狸

太武帝

破梁州黃龍徙

歷代帝王宅京記卷十四

六

朱氏槐廬校刊

其居民大築郭邑截平城西爲宮城四角起樓女墻門不施屋城又無塹南門外立二上門內立廟開四門各隨方色凡五廟一世一間瓦屋其西立太社佛狸所居雲母等三殿又立重屋居其上飲食廚名阿眞廚在西皇后可孫恒出此廚求食殿西鎧仗庫屋四十餘間殿北絲綿布絹庫土屋一十餘間太子宫在城東亦開四門瓦屋四角起樓妃妾住皆土屋婢使千餘人織綾錦販賣酤酒養猪羊牧牛馬種菜逐利太官八十餘窖窖四千斛半穀半米又有懸食瓦屋數間置尙方作鐵及木其袍衣使宮內婢爲之太子別有倉庫其郭城繞宮城南悉築爲坊坊開巷坊大者容四五百家小者容六

七十家每南坊搜檢以備姦巧城西南去白登山七里於山邊別立父祖廟城西有祠天壇立四十九木人皆長丈許白幘練裙馬尾被立壇上常以四月四日殺牛馬祭祀盛陳鹵簿邊壇奔馳奏伎爲樂城西三里刻石寫五經及其國記於鄴取石虎文石屋基六十枚皆長丈餘以充用自佛狸至萬民帝獻文世增雕飾正殿西築土臺謂之白樓萬民禪位後常游觀其上臺南又有伺星樓正殿西又有祠屋琉璃爲瓦宮門稍覆以屋猶不知爲重樓並設削泥采畫金剛力士胡俗尙術又規畫黑龍相盤繞以爲壓勝

水經注曰羊水又東注於如渾水亂流逕方嶺上有文

歷代帝王宅京記卷十四

七

朱氏槐廬校刊

明太皇太后陵陵之東北有高祖陵二陵之南有永固堂堂之四周隅雉列榭階欄檻及扉戶梁壁椽瓦悉文石也檐前四柱採洛陽之八風谷黑石爲之雕鏤隱起以金銀間雲雉有若錦焉堂之內外四側結兩石扶疑作

跌帳疑作張

青石屏風以文石爲椽竝隱起忠孝之容題

刻貞順之名廟前鑄石爲碑獸碑石至佳左右列柏四周迷禽闔日院外西側有思遠靈圖圖內有齋堂南門表二石闕闕下斬山累結御路下望靈泉宮池皓若圓鏡矣

如渾水又南分爲二水一水西出南屈入北苑中歷諸池沿又南逕虎圈東魏太平眞君五年成之以牢虎也

季秋之月聖上親御圈上勅虎士效力於其下事同奔  
戎生制猛獸朱謀偉曰穆天子傳云有虎在乎葭中  
七萃之士高奔戎請生捕虎必全之卽

詩所謂袒裼暴虎獻於公所也故魏有捍虎圖也

又逕平城西郭內魏泰常七年所成也城周下有西郭

外有郊天壇壇之東側有郊天碑建興四年立

其水南又屈逕平城縣故城南史記曰高帝先至平城  
史記音義曰在雁門卽此縣矣王莽之平順也魏天興  
二年遷都於此太和十六年破太華安昌諸殿造太極  
殿東西堂及朝堂夾建象魏乾元中陽端門東西二掖  
門雲龍神虎中華諸門皆飾以觀閣東堂東接太和殿  
殿之東階下有一碑太和中立石是洛陽八風谷之石

歷代帝王宅京記卷十四 八

朱氏槐廬校刊

緇也殿之東北接紫宮寺南對承賢門門南卽皇信堂  
堂之四周圖古聖忠臣烈士之容刊題其側是辯章郎  
彭城張僧達樂安蔣少游於下有闕文堂南對白臺臺甚高  
廣臺基四周列壁閣路自內而升國之圖籙秘籍悉□  
其下臺西卽朱明閣直侍之官出入所由其水夾御路  
南流逕蓬臺西魏神瑞三年又毀建白樓樓甚高竦加  
觀榭於其上表裏飾以石粉皜曜建素赭白綺分故世  
謂之白樓也後置大鼓於其上晨昏伐以千椎爲城里  
諸門啟閉之候謂之戒晨鼓也

又南逕皇舅寺西是太師昌黎馮晉國所造朱謀偉曰

字晉國文明太后兄也官定州刺史進爵昌黎王在諸  
州鎮建佛圖精舍合七十二處孝文卽位爲侍中太師

有五層浮圖其神圖像皆合青石爲之加以金銀火齊衆綵之上煒煒有精光又南逕永甯七級浮圖其制甚妙工在寡雙又南遠出郊郭弱柳蔭街綠楊被浦公私引裂用周園挽宋本作園繞長塘曲池所在布濩故不可得而論也

一水南逕白登山西服虔曰白登臺名也去平城七里如淳曰平城旁之高城若邱陵矣今平城東十七里有臺卽白登臺也臺南對岡阜卽白登山也故漢書稱上遂至平城上白登者也爲匈奴所圍處孫暢之述畫曰漢高祖被圍七日陳平使能畫作美女送與冒頓闕氏恐冒頓勝漢其寵必衰說冒頓解圍於此矣

歷代帝王宅京記卷十四

九

朱氏槐廬校刊

其水又逕甯先宮東獻文帝之爲太上皇也所居故宮矣宮之東次下有兩石柱是石虎鄴城東門石橋柱也按柱勒趙建武中造以其石作工妙徙之於此余爲尙書祠部與宜都王穆羆同拜北郊親所經見柱側悉鏤雲炬朱謀埠曰當作雲烟上作蟠螭甚有形勢信爲工妙去子丹碑則遠矣

其水又南逕平城縣故城東司州代尹治皇都洛陽以爲恒州水左有大道壇廟始光二年少室道士寇謙之所建也兼諸嶽廟碑亦多所署立其廟階五成宋本作三成

四周欄檻上階之上以木爲圓基令于相枝梧以板切

宋本作砌其上欄陛承阿上圓制如明堂而專室四戶室內

有神坐坐右列玉磬皇輿親降受籙靈壇號曰天師宣揚道式暫重當時壇之東北舊有靜輪宮魏神廡四年造抑亦柏梁之流也臺高廣超出雲間欲令上延霄客下絕囂浮太平真君十一年又毀之物不停固白登亦繼褫矣水石有三層浮圖真容鷲架悉結石也裝制麗質亦盡美善也東郭外太和中闔人宕昌公鉗耳處時立祇洹舍於東皋椽瓦梁棟臺壁櫺陛尊容聖像及牀坐軒帳悉青石也圖制可觀所恨惟列壁合石疎而不密庭中有祇洹碑題大篆非佳耳然京邑帝里佛法豐盛神圖妙塔桀時相望法輪東轉茲爲上矣

其水自北苑南出歷京城內河千兩湄太和十年累石

歷代帝王宅京記卷十四

十

朱氏槐廬校刊

結岸夾塘之上雜樹交蔭郭南結兩石橋橫水爲梁又南逕籍田及藥圃西明堂東明堂上圓下方四周十二戶九堂而不爲重隅也室外柱內綺井之下施機輪飾縹仰像天牀畫北道之宿烏蓋天也

朱謀埜曰當作畫臨辰列宿象蓋天

也每月隨斗所建之辰轉應天道此之異古也加靈臺

於其上下則引水爲辟雍水側結石爲塘事準古制是太和中之所經建也

地理志曰西京大同府陶唐冀州之城虞分并州夏復

屬冀州周職方正北曰并州戰國趙武靈王始置雲中

郡秦

當作漢

屬代王國爲平城縣魏爲新興郡晉仍屬雁

門劉琨表封猗盧爲代王都平城遼史興宗紀曰重熙

十三年十一月丁卯改雲州爲西京元魏道武於此遂建都邑孝文帝改爲司州牧置代尹遷都洛邑改萬年又置恒州高齊文宣帝廢州爲恒安鎮今謂之東城尋復恒州周復爲恒安鎮改朔州隋仍爲鎮唐武德四年置北恒州七年廢貞觀十四年移雲中定襄縣於此永淳元年默啜爲邊患移民朔州開元十八年置雲中州天寶元年改雲中郡乾元元年曰雲州乾符三年大同軍節度使李國昌之克用爲雲中守捉使殺防禦使據州以聞僖宗赦克用以國昌爲大同軍防禦使不受命廣明元年李琢攻國昌國昌兵敗與克用俱奔北地黃巢入京師詔發代北軍尋赦國昌使討賊克用率三萬

歷代帝王宅京記卷十四

十二

朱氏槐廬校刊

五千騎而南收京師功第一國昌封隴西郡王克用子存勳滅梁是爲唐莊宗同光三年復以雲州爲大同軍節度使晉高祖代唐以契丹有援立功割山前代北地

爲賂大同來屬因連西京下云

重熙十二年升爲西京此卽云建西京史文之

誤敵樓棚櫓具廣袤二十里門東曰迎春南曰朝陽西

曰定西北曰拱極元魏宮垣占城之北面雙闕尙在遼旣建都用爲重地非親王不得主之清甯八年建華嚴寺奉安諸帝石像銅像又有天王寺留守司衛南曰西省北門之東曰大同府北門之西曰大同驛初爲大同軍節度重熙十三年升爲西京府曰大同

金史地理志曰大同府遼爲西京金因之大定五年建

宮室名其殿曰保安其門南曰奉天東曰宣仁西曰阜  
成天會三年建太祖原廟

置留  
守司

歷代帝王宅京記卷十四

十二

朱氏槐廬校刊

光緒歲在著雍困敦春月吳縣朱記榮槐廬家塾校刊  
歷代帝王宅京記卷十四終